

Newspaper	BERITA HARIAN
Date	09 JUNE 2017

# PM lancar tiga dokumen besar RPN

BH- 9/6/2017 pg. 2

➔ Tentukan  
hala tuju  
pembangunan  
negara lebih  
dinamik,  
seimbang

**Oleh Irwan Shafrizan Ismail**  
irwansha@bh.com.my

► **Putrajaya**

**D**atuk Seri Najib Razak semalam melancarkan tiga dokumen besar di bawah Rancangan Pemajuan Nasional (RPN) bakal menentukan hala tuju pembangunan negara lebih dinamik, seimbang dan berdaya saing.

Tiga dokumen itu ialah Rancangan Fizikal Negara Ketiga (RFN Ke-3), Dasar Perbandaran Negara Kedua (DPN Ke-2) dan Dasar Perancangan Fizikal Desa Negara (DPF Desa Negara).

Perdana Menteri berkata, ketiga-tiga dokumen RPN itu sangat mustahak untuk menjadi rujukan pelbagai agensi dalam merangka program pembangunan fizikal negara yang efisien dan mampan

untuk menangani cabaran pembangunan masa depan.

"Ia juga menjadi instrumen bagi mencapai mutu persekitaran dan pembangunan lestari serta berperanan sebagai tindak balas terhadap globalisasi dan kepesatan pembangunan.

### Tingkatkan taraf hidup

"Ia juga mustahak untuk meningkatkan taraf hidup isi rumah dan penyediaan perumahan mampu milik yang bermutu bagi membantu golongan berpendapatan rendah 40 peratus terbawah Malaysia (B40) dan golongan berpendapatan pertengahan (M40).

"Ini supaya mereka tidak terpinggir daripada menikmati arus kemajuan negara," katanya berucap pada majlis pelancaran RFN Ke-3, DPN Ke-2 dan DPF Desa Negara, di sini, semalam.

Yang turut hadir Menteri Ke-

sejahteraan Bandar, Perumahan dan Kerajaan Tempatan, Tan Sri Noh Omar dan Timbalannya, Datuk Halimah Mohd Sadique.

Najib berkata, penyediaan RPN itu selaras dengan Rancangan Malaysia Ke-11 bagi memastikan pembangunan berlaku dengan seimbang dan saksama di setiap ceruk rantau tidak kira kampung, desa, atau bandar seluruh negara.

Perdana Menteri percaya dokumen yang dirangka itu memang berpaksikan manifestasi dan mengambil kira pandangan, kemahuan serta aspirasi selain keperluan setiap lapisan masyarakat.

"RFN sudah melalui dua fasa kajian semula yang bermula dari 2005 sehingga RFN Ke-3 disediakan pada 2015, yang juga dokumen perancangan tertinggi dalam rangka kerja perancangan pembangunan fizikal negara.

"RFN menjadikan Malaysia ne-

gara pertama pada peringkat antarabangsa yang mempunyai rangka perancangan dan pembangunan spatial pada peringkat negara," katanya.

DPN pula, katanya, adalah dasar yang memandu dan menyelaras perancangan pembangunan dan pentadbiran perbandaran supaya menjadi lebih cekap lagi sistematik dengan penekanan terhadap keseimbangan pembangunan sosial, ekonomi serta fizikal.

"DPN dimulakan pada 2006 sehingga kepada DPN Ke-2 yang bermula pada 2016 di mana tempoh perancangannya sehingga 2025," katanya.

DPF Desa Negara pula adalah dasar pembangunan desa yang pertama di Malaysia berbentuk spatial, yang bertujuan mewujudkan perancangan holistik bagi pembangunan desa dan melengkapkan DPN.